

經籍典第三百五十六卷

經學部傳經名儒列傳三十

明三 蔡清

按明外史儒林蔡清傳清字介夫晉江人警悟絕倫總角就家塾屢誦其師乃裏糧數百里就候官林珖學易盡得其肯綮舉成化十三年鄉試第一二十年成進士卽乞假歸講學於僊寺一日爲母寫真母愀然曰吾聞母以子貴汝舉進士有年矣吾猶故服耶清聞言泣下卽赴選得禮部祠祭主事是時王恕爲吏部重清調爲稽勳主事恆訪以時事清乃上二札一請振紀綱一薦名士劉大夏等三十餘人恕皆納用尋以母憂歸服闋吏部有不悅清者復除祠祭員外郎乞便養改南京文選郎中一日心動急乞假養父歸甫兩月而父卒自是家居授徒不出正德改元卽家起江西提學副使鑒別精明士類競勸時寧王宸濠驕恣凡朔望諸司先朝王次日謁文廟清不可約行禮同日先廟而後王王生辰令諸司以朝服賀清曰非禮也去蔽膝而入王積不悅一日設晏謂清不能詩清徻爲不聞也答曰清生平與人無私會王求復護衛已得請清有後言王益怒欲誣以詆毀詔有清

遂乞休王佯爲輓留且許以女妻其子清竟力辭去時劉瑾亂政知天下非議已乃用蔡京召楊時故事起清南京國子祭酒命甫下而清已卒時正德三年十二月年五十六清之學初主於靜後主於虛故以虛名齋平生飭躬砥行不愧衾影貧而樂施爲族黨依賴旣以善易名天下天下士執業者靡至應之不倦所著易經四書蒙引遂盛行於世場屋士守之不敢變曰此蔡虛齋先生說也初友孫爰林俊甯永貞師何喬新旣友楊廉丁璣江朝東而極推陳獻章擬之北斗爛然可望而不可及其取友樂善如此嘉靖八年其子推官存遠以易經蒙引進於朝詔爲刊布萬曆中賜諡文莊追贈禮部右侍郎其門生陳琛王宣易時中林同趙逵蔡烈並有名而陳琛最著

王宣

按明外史儒林王宣傳宣晉江人旣受業蔡清學有心得嘗謂學者混朱陸爲一便非真知弘治中舉於鄉一赴會試不第以親老須養不復再赴爲人廓落豪邁俯視一世論者謂其高明之資不淪於卑污自得之學不滯於章句絕俗之行不混於塵俗亦師門之矯矯出羣者

易時中

按明外史儒林易時中傳時中字嘉會晉江人舉於鄉授東流教諭遷夏津知縣有惠政時州縣吏謁上官卑屈如與隸時中獨雍容拜起御史怒語人曰易某侮我或以謂時中時中曰吾聞以禮事上爲恭非禮乃侮也吾何敢吏部召試臺諫以年自實不赴稍遷順天府推官以治胡守中獄失要人意將中以他事時中方念母遂以終養歸道出夏津老稚懽迎數舍爭獻果脯將別有哭失聲者其得人心如此母年九十一而終時中年七十矣毀不勝喪宗黨稱孝焉時中師蔡清而其徒則王慎中自有傳

趙遂

按明外史儒林趙遂傳遂字子重東平人弘治中舉鄉試受易於蔡清先是蔡氏易止行於閩南及是清大喜盡以語之由是蔡氏易北行齊魯矣居母喪毀瘠州長吏每過之輒太息而去後會試不利遂抗志不出遂博覽多通尤好濂洛諸子之學在先朝獨好薛氏讀書錄嘗曰三日不讀心過滋矣長吏聘修州志黜仙釋崇義烈他無徵實者不錄有懷金以請者遂悚然曰吾豈有邪德耶此物奚宜至哉少議論踔厲好面折人過晚更和粹不以己長格人羣目爲厚德君子

陳琛

按明外史儒林陳琛傳琛字思獻晉江人資英邁杜門獨學時人未之識也蔡清見其文異之曰吾得友此人足矣不敢爲之師也琛因介友人見清清曰吾所謂發憤沉潛辛苦而僅得者以語人常不解不意子已自得之今且盡以付子矣於是遂爲弟子清沒十年琛始舉進士時編修尹讓得琛卷嘆異以呈主考官貴曰是必出陳白沙門否則蔡虛齋之徒也榜發果然一日名動京師初授刑部主事乞便養改南京戶部權稅淮安課既登卽弛禁任商舟往來部尙書責其怠事不顧也尋調南京考功主事以微號恩獲封贈其親琛喜曰此足以慰父母矣遂乞終養歸嘉靖七年廷臣有薦其恬退者有詔徵之琛辭居一年卽家起貴州按察僉事旋改江西皆督學校並辭不赴家居却掃一室偃臥其中靜觀天地萬物消長之變古今治亂興衰之迹及世俗得喪炎涼之態或悠然孤笑或喟然長嘆時放於山砧水涯與漁樵問答或縱步阡陌與田夫野老語桑麻道故事爲樂絕跡公府長吏莫得見其面論者謂道德行誼無愧師門云始清督學江西與琛偕行較士得進賢舒芬卷琛已置之清覆視拔爲第一榜發諸生譁然不服清大書芬卷曰卽日大魁天下異日必爲忠孝

名臣也已而果然琛每道此事稱清神鑒不可及也琛所著易經通典四書淺說舉業家並宗之

林希元

按明外史儒林陳琛傳同郡林希元字懋貞與琛同舉進士歷官雲南按察僉事考察不謹冠帶坐閑住所著易經四書存疑與蒙引通典淺說並盛行於世嘉靖二十九年上所改大學經傳定本及存疑於朝世宗大怒詔焚其書下巡按御史逮問褫其冠帶然其書猶行於時以居鄉不檢故不爲士論所稱

蔡烈

按明外史儒林蔡烈傳烈字文繼龍溪人父吳瓊州知府烈弱冠爲諸生受學晉江蔡清莆田陳茂烈有所悟入遂隱居鶴鳴山之白雲洞時方壯歲知府潘巨勸之仕對曰昔漆雕未信若烈則未見也嘉靖十二年詔舉遺佚知府陸金以烈應監司勸駕力以母老辭巡按御史李元陽檄郡邑建書院亦固辭忽山鳴如雷三日烈遂卒烈性剛方晚年充養和粹終日危坐非劇病無怠容雖大橫逆不見怒色提學副使邵銳聞而訪之談論終日蔬食相對副使柯喬嘗劇談道體潛天潛地烈徐應

曰道固察天地端則始夫婦但屋漏無愧天地自位主簿詹道請論心烈則論事曰孔門求仁未嘗出事外也堯舜之道孝弟而已夫子之道忠恕而已學士豐熙戍鎮海見烈嘆曰先生不言躬行熙已心醉矣提學副使朱衡稱曰力行好學老而不倦漳南又一布衣也所著有孝經定本大學格物致知傳道南錄朱子晚年定論諸儒正論大儒粹言讀書錄諸書

林祺

按明外史儒林蔡烈傳同邑有林祺者少爲諸生豪宕不羈後乃收斂力行母卒哀毀骨立足不踰戶嘗輯續伊洛淵源錄考亭麗澤錄高東溪遺澤錄陳布衣文鈔漳獻備忘漳文備忘古文指掌錄諸書祺得年僅三十餘方著書時人無知者既沒檢其篋乃得此數種

夏尙樸

按明外史儒林夏尙樸傳尙樸字敦夫廣信永豐人少有志操正德初會試赴京見劉瑾亂政慨然嘆曰時事如此尙可干進乎不試而歸六年成進士授南京禮部主事官曹清簡日討求載籍敦厲正學歲饑道殣相望急條上救荒數事多見施行再遷廣東惠州知府道聞上官驕倨難共事卽投

劾歸嘉靖初言官交薦起山東提學副使擢南京太僕少卿與魏校湛若水輩日相講習八年言官劾大學士桂萼語連尙樸吏部尙書方獻夫白其無私世宗不問尙樸尋引疾歸早年師事婁諒傳主敬之學常言纔提起便是天理纔放下便是人欲魏校聞而亟稱之所著有中庸語東巖文集東巖者尙樸別號也

潘潤

按明外史儒林夏尙樸傳同邑潘潤字德夫亦常受業於婁諒諒爲人嚴毅英邁誨之曰禮有之致禮以治躬外貌斯須不莊不敬而慢易之心入之矣致樂以治心中斯須不和不樂而鄙詐之心入之矣此禮樂之本身心之學也潤佩之終身罔敢越軼李夢陽來督學詢及人才諸生僉舉潤夢陽致禮欲見之潤時居憂以衰服往拜門外終不肯見夢陽嘆其知禮官終成都教諭

湛若水

按明外史儒林湛若水傳若水字元明增城人舉於鄉不赴會試從陳獻章游以隨處體認天理爲宗獻章喜曰此子參前倚衡之學也久之以母命應試遂登弘治末年進士改庶吉士授編修母喪

歸廬墓三年服闋授徒講學從者日盛嘉靖初還朝上經筵講學疏二年夏疏言陛下初政漸不克終左右近侍爭以聲色異教蠱惑上心大臣林俊孫交等不得守法多自引去可爲寒心急宜親賢遠姦窮理講學以隆太平之業未幾有旨停日講若水言講筵雖免猶當操存此心不使放逸時召對大臣慎擇左右以爲交修之助並報聞明年進侍讀復疏言臣以經術事陛下嘗讀屯否陰陽始交而難生君臣欲有爲而未遂此則陛下登極時然也否則陰陽間隔而不通內外扞格而不合陛下視今日於此卦何如哉夫屯而不濟必至於否否而不濟將有不可勝言者今一二年間天變地震山崩川湧人饑相食殆無虛月夫聖人不以屯否之時而後親賢之訓明賢不以深錮之疾而廢元氣之劑今元氣之劑急親賢是已願以賢大臣爲之統領博求明先王之道者日侍文華講磨聖學臣不勝惓惓擢南京國子祭酒遷南京吏部右侍郎進所撰聖學格物通一百卷八年召爲禮部右侍郎上無逸篇講義及君臣同遊雅詩尋進左侍郎疏言陛下以皇儲未建精禋祈禱求之於神者至矣臣以爲當求其在己者在己者何收斂精神是已斂之則全用之則散目多視五色則散於五色耳多聽五聲則散於五聲心多役百爲則散於百爲願陛下凝神定慮不役精神耳目思爲以

爲生育之本帝覽之不悅報曰爾欲朕收斂精神復爲此煩擾耶四川獻白兔進演雅以寓規諷帝優答焉歷南京吏禮二部尙書進所撰二禮經傳測以曲禮儀禮爲經禮記爲傳禮部尙書夏言謂其以曲禮爲先與孔子之言相反詔罷其書不省十八年改南京兵部參贊機務條奏兵民便宜十事報可若水在南都久禁火葬置漏澤園定喪祭儀節使人易守有劉公廟都人羣奔走禱祀爲沉其像於江毀私剏庵院勒僧尼歸俗躬巡阡陌勸民農桑以其暇與門人講學四方賢士競進時王守仁久沒若水位高而又善勸諭故門人之多亞於守仁十九年以年滿七十致仕歸年九十五而卒隆慶時贈太子太保諡文簡始獻章之門學徒雖衆不甚與之論學其諄諄講授者若水一人而已故獻章卒爲服心喪三年所至必建祠奉祀生平著書甚富學者多稱之先是御史馮恩論列大臣詆若水爲無用道學後給事中游居敬劾其學術偏詖志行邪僞至請禁若水及守仁所著書盡毀天下書院部議從其言幾敗僞學之禍天下惡之

張詡

按明外史儒林張詡傳詡字廷實南海人父瑣舉進士歷撫州潯州知府詡力行好古厭薄章句莆

田彭韶見其詩美之曰嶺海孤鳳也受業陳獻章深爲所許第成化二十年進士請告歸無仕進意總督屠滂檄有司趣之乃赴都授戶部主事尋遭親喪遂隱居不出弘治十四年巡按御史賈鏜疏謫學問優長操履端慎杜門高尚不干時事部牒下有司速駕以疾固辭正德初御史程材王旻先後疏薦部牒再下又不起久之御史周謨高公韶復相繼論薦有詔起之九年卽家拜南京通政司左參議有司敦趣上道其疏辭抵官謁孝陵輒引疾歸歸未經旬而卒年六十獻章嘗言廷實之學以自然爲宗以忘己爲大以無欲爲主卽心觀妙以揆聖人之用其相契如此自獻章抗志不仕高視物表其門下士化之多不輕爲世用而謫其尤也其他若李承箕陳庸林光亦以風操聞

李承箕

按明外史儒林李承箕傳承箕字世卿湖廣嘉魚人自爲諸生已厭薄科舉之學所司迫趣乃就試成化末舉於鄉聞陳獻章倡道于江門往師焉獻章與之登臨弔古賦詩染翰凡天地間耳目所聞見古今載籍所存無所不語所不語者獨此心通塞往來之機生生化化之妙欲承箕深思而自得之久之有所悟入歸築臺於黃公山讀書靜坐其中不復仕進自嘉魚抵新會水陸千餘里承箕往

返者四其爲人曾懷灑落天姿高曠最爲獻章所契在師門更無過之者卒於弘治末年五十四承箕家世仕宦父田副都御史兄承恩承芳弟承勛承顏並登仕籍而承箕獨淡於宦情乃其名更出諸李上云

陳庸

按明外史儒林陳庸傳庸字秉常南海人好古力學舉成化十年鄉試師事陳獻章獻章示以自得之學謂我然子亦然我否子亦否然否由我於子何有庸深契之自是潛心靜坐多所自得羅倫莊昶望重一時少許可遇庸輒心服年踰五十親友強之仕始赴選授荊門州同知到官五日不能隨時俯仰輒棄官歸足不履城郭督學副使王弘欲見之不可得病革沐浴更衣設獻章像焚香再拜而卒年八十有六所著有東峰語錄

林光

按明外史儒林林光傳光字緝熙東莞人好學博綜經史初得吳澄論學諸書大感悟建得趣亭日讀書涵養其中舉成化元年鄉試五年邂逅陳獻章於京師與語大悅從歸江門曰吾得師矣遂執

贊爲弟子獻章亦深許之已而築室橿山往來叩擊者十餘年玩心神明學多自得總督朱英勸之仕不應父喪既除母強之仕二十年始以會試乙榜除平湖教諭勉學者探本窮源反身修行一時多率教弘治初疏陳敦風化養廉恥二事孝宗納之巡視侍郎彭韶待以賓師禮嘗主考福建湖廣分考順天鄉試得士爲多舉卓異改兗州教授以母年高乞近地便養吏部不許未踰年而母卒頗爲獻章所責服除起官嚴州歷國子博士襄府左長史致仕歸年八十一而卒先常有言所謂求道者在自得耳讀盡天下書說盡天下理無自得處終是閒也其有得於師門如此自獻章獨證本心鄙先儒傳註爲糟粕故出於其門者多不務著述云

魏校

按明外史儒林魏校傳校字子才崑山人弘治十八年進士授南京刑部主事歷員外郎郎中每訊重囚齋居默念務期得情會審監刑衆彩衣泣事事訖宴飲爲歡校獨慘然淡服不飲酒食肉守備中官劉瑯驕恣他人望塵奔謁校獨不往瑯蔑視法官時判牒至莫有抗者校獨行意自如有經歷姚元者從子利其貲誣以姦狀賄校爲之地校竟直之暇則與諸曹郎余祐夏尙樸王道輩講明正

學時望蔚然正德九年召爲職方郎中時江彬方握重兵而寧王宸濠顯有異志遂移疾歸世宗嗣位用薦起廣東提學副使力以師道自任崇德行略文藝毀淫祠興社學禁火化厚人倫諸生咸以爲得師曹溪僧寺有唐慧能相傳衣鉢取而焚毀之曰無使惑世誣民也嘉靖二年大計羣吏詔治行卓異者賜衣及宴其在任者撫按官遣人賚賜綵幣羊酒校與焉尋以憂去五年復計羣吏科道官拾遺坐校不及當調吏部言校學行素優以嚴召謗不當謫乃以故官起江西兵備改河南復督學政七年召爲太常少卿移大理明年三月遷國子祭酒直經筵八月以進講不稱旨復爲太常少卿進本寺卿致仕二十年言官會薦報罷又四年卒贈禮部右侍郎諡恭簡鄉人立祠祀之校之學私淑於胡居仁以立本研幾爲主慎獨以通於性命稽古以協於明誠始博而終約貫動靜而一之爲近世儒宗學者稱莊渠先生始與王守仁論學守仁言心體常動校怫然起去晚而悔之謂恨不究極其說初疑象山爲禪後始知爲坦然大道其於居仁主敬宗旨又稍變矣著有大學指歸六書精蘊諸書

倪復

按明外史儒林倪復傳復字汝新鄞人性端嚴嗜學窮探幽渺務得指歸嘗曰士生程朱後已幸有坦途矣更欲立門戶與抗耶尤精於鍾律潛思默解能通其妙篤於孝友親喪哭泣遂成目疾束修之饋不入私室一以資諸弟檢身以禮市肆優場未嘗一涉足人嚴憚之或羣居談謔復至則寂然斂聲嘗與郡中士大夫雅集復最爲宿老久遲不至或請虛上席先飲及樂奏一客言倪先生至門聞樂聲必返矣偵之果然乃傾一座造門謝過復曰是亦何傷但異時有長者客尙須待之耳師道甚尊而喜引掖後進通政余本其高第也所著有易繫辭解中庸解正蒙發微皇極經世通解鍾律通考閒居漫讀記禘祫議救災集議溶湖議觀古錄東巢雜著壺齋問答見聞欄楯畏齋稿諸書

戴圭

按明外史儒林倪復傳同邑戴圭字秉誠踐履篤實嘗語人曰學須謹獨誠意以修身不怨天不尤人久之自與天一同里張邦奇聞而亟稱之其門人汪玉有言吾執業戴先生門先生年甫三十餘貌莊氣和言簡重動止合矩矱卽舉業而時迪以古人之道迄於今思之不忘其善教人如此所著有易經大旨四書要略

汪視

按明外史儒林汪視傳視字介夫祁門人生周歲而孤母廖氏抗節育之年十三聞薛瑄吳與弼爲人已知嚮慕既讀濂洛諸子書慨然曰不如此便不成人因作持身箴自勗爲諸生卽以學行知名遠近多師之及年三十一謂聖人是時已成立吾猶悠悠然累於舉業若初志何於是并心聖賢之學堅苦刻厲奮迅直前雖訕笑叢至不恤也奉母孝敬備至伯父有疾率從兄弟臥牀下不解衣帶既卒寢不離喪次篤意經史窮年探究雖盛寒暑不輟有所得輒筆記之或勸其出游與世儒一接議論應之曰吾學誠敬爲入門踐履爲實地正容謹節窮理盡性自信不肯先儒奚出游爲迫行道既久鄉邑漸化從游者益進臺司守宰無不造廬致敬焉嘉靖九年以待母疾過勞得疾遽卒年四十有一門生朋舊若喪骨肉多製服哭之所著有槩庵集

何屋

按明外史儒林何屋傳屋字朝舉江西新城人曾祖澄由舉人歷禮科給事中仁宗時以學行推擇與楊溥等共直弘文閣時稱其賢屋遺腹生母愛之不欲煩以學乃夜藏燈勤讀不懈友人鄧康從

永豐羅倫游因歸省與屋等五六人夙夜淬厲爲克己慎獨之學至終夕不就枕窮年不出山家故饒贊仲兄主家政而中落至無室可居處之晏如母卒哀毀幾不能生疾且劇所親持肉羹往食之曰聊以助氣母減性哽咽不能下竟却去葬時霜重冰膠徒跣行十餘里足破流血不止廬墓三年乃返弘治六年舉進士授行人遷南京工部主事入爲戶部員外郎正德時劉瑾聞屋有古琴欲得之屋曰琴非所惜惜毀吾行耳竟不與乃出爲程番知府程番惡地苗獠雜居屋善撫綏有反風屏虎之異歸復授徒著書尤邃於易後進生徒質疑義不遠咨令從容翫諷竟日乃叩兩端以告問者心厭而去平生無僞言飾行入仕二十年蕭然若故所著有易經諸解

李宗枏

按明外史儒林何屋傳同時李宗枏字敬甫安福人七歲時好與羣兒嬉父怒跪之先祠下嚴責之將遣就農宗枏悔遂奮志於學旣爲諸生嘆息曰先王設庠序以明倫復性也豈徒爲科舉設哉自是學專爲己以求放心爲宗容止食息必依於禮而尤篤於孝服勤效力不以假人其學大都宗吳康齋而兢兢於慎獨嘗曰求放心自慎獨始御史張鰲山從受學年僅三十二而卒遠近莫不惜之